

Program di UPM diiktiraf antara terbaik di dunia

SERDANG - Universiti Putra Malaysia (UPM) diiktiraf sebagai antara 100 universiti terbaik di dunia mengatasi lebih 2,000 universiti lain bagi Program Pertanian dan Perhutanan serta Program Pendidikan yang ditawarkan-nya.

Menurut penarafan terbaharu QS World University Rankings 2013/14, Program Pertanian dan Perhutanan UPM berkongsi kedudukan 51 hingga 100 dengan beberapa universiti Asia lain.

Sebanyak tujuh universiti Asia mendapat kedudukan 50 terbaik dengan lima daripadanya adalah universiti Jepun selain masing-masing satu dari Thailand dan Korea Selatan.

Bagi Program Pendidikan pula, UPM turut berkongsi kedudukan 51 ke 100 dengan Universiti Malaya, Malaysia; Beijing Normal University dan Peking University, China serta Seoul National University, Korea Selatan.

Naib Canselor UPM, Prof. Datuk Mohd. Fauzi Ramlan (**gambar**) berkata, ini membuktikan institusi-institusi di UPM berjaya membangunkan program yang bertaraf antarabangsa untuk standard akademik dan kualiti graduan.

"Antara kriteria dalam penarafan itu ialah pembinaan profil kukuh ahli akademik, penyelidikan berimpak tinggi, pengembangan dan pengajaran kepada masyarakat dan pengiktirafan majikan terhadap graduan di seluruh dunia.

"Peningkatan prestasi dalam aspek penyelidikan dan penerbitan daripada fakulti dan program itu di UPM turut membantu ranking universiti," katanya dalam satu kenyataan di sini semalam.

Ujarnya, penambahbaikan dalam aktiviti pengantarabangsaan meliputi mobiliti pensyarah dan pelajar, penyelidikan serta penerbitan jurnal berimpak tinggi berjaya menembusi pasaran antarabangsa.

